

弘一律師題記

師一生接人行事。皆威勝於恩。或有疑其嚴厲太過。不近人情者。然末世善知識。多無剛骨。同流合污。猶謂權巧方便。慈悲順俗。以自文飾。此書所述師之言行。正是對證良藥也。儒者云。聞伯夷之風者。頑夫廉。懦夫有立志。余於師亦云然。九月五日。編錄年譜。撫要訖。復校閱一夢漫言。增訂標注。并記。九月十三日。寫隨講別錄二紙。竟。臥牀。追憶見月老人遺事。并發願於明年往華山禮塔。淚落不止。痛法門之陵夷也。

曩見經目。載一夢漫言。意謂今人所撰導俗佛書。因求得一冊。披卷尋誦。乃知爲明寶華山見月律師自述行腳事也。歡善踊躍。歎爲稀有。執卷環讀。殆忘飲食。感發甚深。含淚流涕者數十次。因畧爲科簡。附以眉註。并考輿圖。別錄行腳圖表一紙。大光謹按。行腳圖表今從畧。冀後之學者。披文析義。無有疑滯耳。

甲戌八月十日披誦訖。二十五日錄竟。并記時居晉水蘭若。弘一